

四庫全書

集部

欽定四庫全書

沙溪集卷十八

明 孫緒 撰

七言古

送彭都憲濟物乃弟錦衣千戶冲回籍祭掃

臺端大老歸未得夜聽春雨晨惻惻燕山高處望秦雲  
漠漠西南天一色四郊未可少英衛一德正爾咨夔稷  
分將經濟繫重輕其那蘋蘩在胸臆聖皇方抱股肱憂

次公正侍明光直便令已事往可遙永言簡在思同則  
朝廊別調塤箎鳴帟藏來供筐篚實花萼三春明畫錦  
松楸千里荷天力班列何人備忠孝君侯此去真奇特  
郵亭看劍星磊落沙場度馬夜昏黑平生萬卷羅心胸  
不效書生數行墨衆中開口論世務重霄驚見扶搖翼  
以茲壯志挾勝遊無限奇觀入藏息干旌遙指金城路  
魚鳥亦避金吾職鄰翁兩兩持壺觴鄉吏紛紛事修飾  
兩朝遭際九泉通一日聲名萬夫識祇陪談笑無終極

太行東峙黃河北西顧重瞳計日程莫為鶯啼滯鄉國  
送沈侍御便道歸省

丈夫遊宦居閒散斗粟未充衣未煖顯榮有志將柰何  
閒庭終日張雀羅古人今人重柱史萬夫辟易看頤指  
青春繡斧羨君歸無限聲華溢甘旨驕行驄馬金鞍光  
塵埃不敢沾衣裳陰陰楊柳平湖路習習清風綠野堂  
堂中大老良方伯蚤乞閒身對泉石杖屨違來今幾年  
年年天際孤雲白今年去作觀風使花鳥窺人知樂意

攬轡誰知有范滂捧檄真能賤毛義村巷傳呼御史臨  
紛紛拜揖人如林三三兩兩里父歎一經不負當年心  
桑榆歛忽生蘭茝鎮日歡娛夜未改戲綵新供畫錦明  
婉容猶帶霜威在曉起南望天濛濛海波嶺樹迷雙瞳  
急別庭闈問前路一封歸奏明光宮

鍾呂煉丹圖

五行之質其成在天亦有人力窮其玄乾坤本洪爐陰  
陽自烹煎吾鼎水火竊其全甄陶鼓鑄宜相駢鍾能傳

呂能悟妙出天機無言真徑路呂可愛鍾可敬坐對鬚  
眉萬境空月到天中雲自淨朦朧堪笑今壽張手持麈  
尾輕侯王

楊師文驄馬行春圖

春光滿地花枝明千朵萬朵爭春榮原頭昨夜沐微雨  
落紅點盡蒼苔英宿霧濛濛天未曉百轉鶯聲啼不了  
杖藜屐齒處處同客衣遙映青山小臺端有暇堪忘機  
呼僮命騎尋春暉平原綠草細如綫金鞍燦爛青驄肥

繡衣使者行秋令春陽莫挽冰霜性帶得清風下草萊  
氛消翳退天容淨昔年曾看長安花宮袍畫錦明烏紗  
四聰今日付耳目皇恩浩蕩天無涯誓將生死酬磅礴  
我行豈為恣遊樂三三兩兩野父來丁寧敢厭詢民瘼  
耳聽時事心忉忉鴟鴞鳴畫豺狼嗥田家正爾無夜食  
可憐歌舞盈春郊便將眼界入封事百口不為謀食累  
江湖尚然憂廟廊況我澄清當攬轡五雲繚繞前山阿  
未央回首紅光多永懷耿耿不成寐仰天終日看明河

侵朝再拜紫宸下臣心非是悠悠者所學豈敢負敬輿  
卑論未忘羞陸賈懷中一札救時章長跪取讀聲  
琅琅當寧動容百辟懼起看白日無耿光大姦縮首羞  
欲死束身臺席朝堂裏欺明有術竟不然空歎前人詠行  
止歸來窮困不泥塗詩書為崇暴為徒壺觴朋舊日取  
醉是非此外真區區紙屏一枕閒睡足起視斜陽在高  
木剝啄有客叩柴關濁酒牀頭今又熟朝遊北里暮南  
鄰烹鷄剪韭歡悰新濕衣風露夜歸去蒺藜古道方秦



慕誰將丰米入圖繪使我一見心神會和風煦日自可  
親鳴鳳雖雖鸞翩翩我從髫歲蒙規箴知君古貌又古  
心輩流緘口取大位蒼茫海若矜蹄涔對圖指點悲今  
昔人生有質非金石花顏肉映此少年邇來誰遣頭顱  
易安得年年只此同鬢髮常綠顏常紅試向東皇問玄  
化神仙家住蓬萊宮

喜駱夏官原忠見過

炎風吹雲千萬里一色長天淨於洗焦枯望雨雨未來

四民都落薰籠裏林亭散髮臥不收揮揚巨扇奚奴愁  
君從何處枉命駕使我一見涼如秋瘦骨稜稜客衣薄  
玉壺冰映青松壑堪與萬古付雙眼書劍多年伴孤鶴  
忙催雞黍解征驂相逢莫愛今宵談憐君到處看落落  
愧我老髮垂髣髴君迹平生半天下世人誰是同心者  
姚江歸計近如何曾有音書到寧夏扁舟一葉萍湖海  
舊日頭顱宛未改丁寧笑指青囊書虎踞龍蟠竟安在  
夜深坐久成歎息眼見薔薇變荆棘我貧惟賴天垂鑒

君才未必人盡識昔年兩縣排高牙青春黃甲人爭誇  
子規夜呌甘棠月暖雲日護河陽花璽書微去入鴈鷺  
狂飈正值斜陽暮簫距漫爾談京兆鋒刃森然真武庫羨  
君清辨能結舌羨君多奇能用拙聖主明堂錄非封如  
君豈合終巖穴行看有子復有孫天行自昔相輕軒明  
朝把臂送君去歸來依舊掩衡門

四皓圖為趙十松明府題

孤雲野水留不住只在商山最深處山中幽人相對閒

兩兩青藜自來去秦廷耆舊漢逸民  
花開花落春復春埋光不問漢甲子  
古貌猶著秦衣巾松風竹日碁一局  
怕談時世閒榮辱呼童緊緊閉柴關  
莫遣浮埃過山曲漢家天子昵柔情  
戚姬顏貌真傾城忍將四海付幼弱  
不念百戰親經營國本搖搖民欲弔  
夜深百子池邊笑臣良黯黯不勝愁  
臣昌期期不奉詔迷愛難將口舌爭  
由來幽闇怯高明念彼山人帝莫致  
聲價常使心神驚鸞書鶴駕夜將送  
振衣奮目來相共青宮柱石佇生輝

低昂一髮千鈞重人言漢祖溺儒冠嫚罵箕踞恒難堪  
胡為此老一朝入頓令江海回狂瀾乃知抱道當自閔  
鋒藏不深發不利抗顏一語即奇勲漢廷百計成何事  
商山有石水有波蒼崖翠壁高嵯峨胡亥扶蘇事可鑒  
楚歌楚舞將柰何韓彭帶礪今誰在回首舊山青未改  
紫芝新生又幾蓂黃鵠高飛橫四海戚姬子母誠堪憂  
宮中舉眼皆深讐倉卒還有安劉計付與他年周絳侯  
南山主人舊公族手撫十松憶空谷請看四老為時出

大夫何可終幽獨

輞川圖為趙明府題

輞川莊上王右丞勛名不惜惜閒情平生能詩復能畫  
襟抱直與秋旻清莊後莊前足野水遊魚跳擲閒鷗起  
落花冉冉夕陽多曙色溶溶夜山紫涼風曉月各有情  
柳綠桃紅春幾許湖海同心有裴孟休沐聯鑣自朝市  
椒園竹嶺動經旬指點壺觴到爾汝酣眠未覺早鶯啼  
樹深不礙黃鸝語生綃險韻任冥搜麗曲覩粧隨處所

一身張弛不關人千古精英疑未死世人尚友憶遐蹤  
坐對殘練如對史此本摹來若有神見說瀛東鄭宗楚  
昔人豈曰非吾曹昔何太逸今何勞如今縱有輞川在  
簿領束縛誰能逃李唐愛士惜臣下禮若相憐恩若借  
破軌常寬跖弛材微瑕恐掩連城價李白沈酣終不廢  
杜牧疎狂足叫罵內直乃至夜延客警蹕親逢意不訝  
巖廊寂寂體常尊清晝遲遲政多暇以茲寬裕得勝遊  
遂使流傳作佳話不獨輞川有茲勝江山隨處開圖畫

假使當年尚嚴刻地主戚戚山靈怕公衙終日懼不免  
寧有心情到山舍苔茵草廣誰所賜國士便須以死謝  
安得此語入風謠直把無為佐玄化十松居士五柳徒  
年來苦被簡書拘家在江東未得去無言空對輞川圖

五陵公子夜宴圖為盧潤卿題

玉露無聲墜井梧秋風瑟瑟滿衣襦高堂燈火堪入夜  
王孫殺醴盈庖厨美人一釵千金重紅綃夜夜清尊共  
琵琶幾曲度新聲瑟瑟琴古調將安用海棠顏色芙蓉粧



麝臍龍腦參差香寧知里巷有貧婦終年蠶織無完裳  
永夜驪呼晝未改黃昏猶帶餘醒在兩兩同期白首歸  
豪俠相傾意如海盛衰倏爾違人心肝胆人心君未忱  
平生杯酒在何處閒庭寂寂哀蛩吟太學書生窮莫伍  
短檠未脫陳編苦厭見浮雲變態多一盞藜羹常閉戶  
邢秀才魁星圖

萬事不厭從平易獨有文章貴神異文不神異只陳言  
餽飭徒以多為累邢生有志魁天下六籍百氏久酣醉

愛向瑰奇發孤唱不以卑凡等衆智落筆變幻怪百出  
見者誰能不驚悸糟粕若人累千萬流汗不禁遠走避  
他年文戰用斯售錦標孤格立可致譬如市賈售貨賄  
常品雜陳終不視鮫人蕃客攜短囊衢巷喧呼競窺伺  
燕雀鷄鶩日啾啾堂室尋常見乳字忽聞威鳳出丹山  
聾瞽亦知為世瑞人情恒愛詫希見况復斯文入神思  
請君試看魁星圖作者固應有深意魁名奇貌兩相藉  
堪與吾曹作赤幟君不見樊紹述盧玉川詩文侑曲不

能句千古休光日麗天

剪韭軒即事

五侯盤饌羅烹燔麗歌偏稱如飛軒儒宮一畝足風雨  
垣頽屋漏誰離藩頑陰良夜來佳友斗室罄懸百未有  
呼僮汲水溉釜鬻自涉東園剪新韭大韭數寸方吐花  
小韭出土才新芽一剪一握意未厭笠蓑任逐飄風斜  
瀟瀟徹夜雨未歇明朝肥嫩猶堪誇火活羹調清可掬  
飫腸滿碗甘于肉人生有食飽即休五鼎何為日僕僕

書生口腹真草草膏粱畢世迹如掃借問軒中尚友誰  
見說東京郭有道

悼烈女劉若蘭

嗟吾父憐吾母豪俠顧家郎饒舌里中婦嗟吾母憐吾  
父但願兒有歸不念兒心苦兒有締姻在遠州顧郎信  
美非兒儔十年約誓安可棄一髮綱常誰為謀谿谷隨  
人天地窄此身真與兒為讐便拚一死永相謝漳河萬  
古波東流耿耿素心皎如日森森白刃寒生秋願得他

生諧伉儷鄉井相看共白頭

合浦曲

合浦之水深且渾水勢直欲包崑崙海雲嶺霧怒相盪  
迷冥遠近恒昏昏中有老蚌歲復歲沈默一任波聲喧  
藏深不為鷗鷺伺性靜不逐鯨鯢奔驪龍水底自酣睡  
雲霄何日風雷騫

玉堦怨

井桐漸瀝垂寒露綺牕夜夜疎螢度無言歌枕望明河

河畔繁星不知數永巷迢迢御水深羊車消息空沈沈  
暮聞長樂歌鐘發滿榻秋風獨擁衾

前有猛虎行

前有猛虎後有蛇血吻怒目聲呀呀狂飈落木山欲裂  
山中白骨紛如麻寧使蛇有足莫使虎有翼蛇雖添足  
竟何為虎如有翼誰堪敵山林虎猛亦怕死終歲不敢入  
城市君不見城中猛虎垂饑涎吮民膏血不怕天

大梁車馬行

高軒日日紛如蟻九陌泥塗沒雙軌夜久征塵猶蔽天  
喧呼聲應黃河水五侯賓從何紛紜氣吞七澤凌重雲  
不識屠沽老朱亥聲名虛負信陵君

五禽言

泥滑滑歸人須及晴乾發一朝陷淖失通衢曲街其柰  
王生襪泥滑滑

不如歸去衡茅儘有棲遲處十畝沙田野水濱廟堂鐘  
鼎饒憂慮不如歸去

脫却布袴後園桑柘濃如霧去年紬絹盡輸官今年幸  
遇廉叔度脫却布袴

行不得也哥哥亂山險惡豺狼多狂飈飛礫天地暗岐  
路縱橫將柰何行不得也哥哥

提葫蘆沽美酒伊傅功勛竟何有比鄰新釀隔離香瓦  
盆隨處堪濡首提葫蘆沽美酒

### 古北口行

北口山高高百武山中墳墓難指數總帷丹旆日日來



相將來作山頭土道傍哭送多近親聲振林木干蒼旻  
袖中忍痛看遺字丁寧只恐兒孫貧新墳昨夜初封樹  
墳邊血淚無乾處舊墳摧塌誰堪主老狐夜與石麟語  
今日淒涼擁一杯當年意氣雄千古斷碑年月難重摹  
縱橫歎側都銷腐詞人冥檢入毫芒只與樵人磨巨斧  
蔓草縈纏白骨寒白楊蕭瑟啼秋雨亂峯高處望通津  
山鬼揶揄常笑人

行路難

途人盡說途中好，市酒村羹常醉飽。  
有身何用事犁鋤，有錢何地非堂奧。  
里中遊俠聞之喜，恥向丘園坐枯槁。  
青鞋布襪去如飛，南登匡阜東蓬島。  
一朝暮夜失通衢，月深雲黑山窅窅。  
遠聞豺虎嗥前林，下見虺蛇蟠茂草。  
平時自愛千金軀，此中生死竟難保。  
歸來緊緊閉柴關，回首舊遊心若擣。  
朝春秔稻暮烹雞，餘生誓共妻孥老。  
黃昏失脚踏階砌，脛骨摧傷增懊惱。  
咫尺庭前有畏途，何必羊腸與鳥道。

古詩寄王中丞三首

昔年攬轡甘陵道  
花逕為君曾獨掃  
藤蘿初受月華明  
蒿艾偏驚霜信早  
出門執手重丁寧  
昨夜床頭奏草成  
猿鶴東山莫相怨  
謝安須起為蒼生

庭前燦燦薔薇花  
秋風落盡生荆棘  
黃雀啣來捧主人  
彈石橫遭死簾隙  
世情翻覆是讐恩  
春華徒爾怨王孫  
丈夫志氣自有在  
眼底區區安足論

干旌纔達古瀛區  
千里妖魑一夜除  
霄漢誰問三昧手

風雲常護四明居  
絲苓有意青松壑  
春條無力春陰薄  
山中藜藿未充腸  
暮倚衡門望寥廓

二李生

東村李生蜀方伯  
犀帶金緋光檠戟  
封章三上大明宮  
乞得身閒髮未白  
西村李生老從事  
飽喫鞭撻忘啾詈  
部使命休不肯休  
屢叫閭闔干勢位  
沙溪狂士老彌狂  
怕聽時事生雌黃  
二生同心復同姓  
業同筆硯生同鄉  
胡為末路異軌轍  
眼底誰工復誰拙  
難得失安能知

蝨蝨高緣徒自滅西飛白日東流水勸君為君惜寸晷  
年踰六十尚奔忙不見北村楊秀史

贈盧時賜從事

白馬金羈氣浩然客衣前日別幽燕搖搖易水秋風外  
窅窅瀛洲夕照邊行人隨處問名姓爭識盧家美少年  
歸來下馬拜堂序鄰翁趨走肩相駢堂上尊翁湖海士  
心在山林身在市汪汪千頃學黃憲散積千金羞范蠡  
昔年坎壈居貧時英風不為寒饑衰花徑深深閒不掃

手摩孤劒酬相知魯朱郭解猶碌碌肯逐里中遊俠兒  
晚歲優游單富厚太虛浮雲元未有燕雀飛飛候簾幙  
英賢日日同杯酒中夜鄉閭來叩門劇孟季心思尚友  
疾藜古道險且艱獨與先公日往還行輩都拋鐺杓外  
情好渾如伯仲間我公棄背三十載遐想顒顒久未改  
號呼昆季告同社建祠明裡設脯醢晨鐘暮鼓年復年  
音容蚤夜依稀在時時對我談舊事俛首歔歔淚成海  
若翁我本兄弟流南金瓊玖何時投泉臺有目終不瞑

半生空自慙箕裘今日冠裳明畫錦使我一見開狂眸  
數年負歉且自慰固知善慶恒相儔酌酒起舞叩玄化  
清風習習天悠悠人生有子在仕版一身溫飽復何求  
有官不必居鼎鼎生兒何必封公侯一經可教田可植  
醉鄉何地非良謀從此斑衣日取樂人間萬變真浮漚  
唐明皇賞牡丹圖為李孟川題

三郎愛花兼愛春春遊日日惟心神奇葩異草滿上苑  
承歡無限如花人錦雲紅映溝池水玉質瓊枝笑相倚

樂事元非為賞心只藉豪奢媚妃子海棠開盡茶醪老  
惆悵一番花事了收拾殘春到牡丹宵衣數問龍樓曉  
熒熒初日透深簾一一新粧鬪妍巧天上分來事有無  
洛陽剩得春多少咸京不惜惜芳菲一刻歡悰輕萬幾  
華清宮裏香醒醉花萼樓前雲想衣小者如孟大如斗  
衛娥越女朝酣酒招腰舞態惠風前掩泣柔情膏雨後  
雨膏風惠顏如沃繡被紗籠手未觸半吐頻摧羯鼓聲  
亂翻偏稱霓裳曲劇愛翻嫌花信遲嬌姿忍見春寒欺



奇絕故應人未識丁寧常恐蝶先知侵朝歡賞達黃昏  
夜半襟襦尚酒痕顧景却愁開謝易濃陰還喜條枚繁  
韓休老死九齡廢花神奪盡苞桑計栽培全仗楊國忠  
秦虢時時固根蒂北風一夜烟塵滿花容狼籍春容減  
明日韶華屬祿兒可惜腥膻汙池館有地莫栽無實花  
有情莫騁無窮奢深紅艷紫世安用岷江蜀道天無涯  
愛花往往傾人國金蓮玉蕊聞宿昔草木無情尚禍胎  
況復多情更妖色鄧林喬木千尺強成都松柏參天長

大材遠地只自愛肯與瑣瑣爭春光  
孟川方伯今梁棟  
梗楠梧檟明堂重蹊成桃李終不言節比筠篁  
晚彌勁  
平生不著看花眼  
歲寒獨與江梅共調羹  
佳實在商巖  
指日君王有清夢

送楊北渚尹壺關

金烏拂羽扶桑曉  
白駒遠策壺關道  
纖塵不敢到征衣  
花柳低垂日杲杲  
君心寒貯萬斛冰  
君才水湧三江清  
宦途夙抱林泉興  
垂髫已負文章名  
先公老儒富詩禮

有弟西臺振風紀陳家堂序難弟兄劉向休名同父子  
我性慵疎君曰賢平生風雨牀相連屢向詞鋒驚白戰  
綺寮欸忽生雲烟鼎彝不日歸清廟巨鰲戴山不受釣  
剗切劉蕢終下第陸沈羅鄴空高調平生北渚汪洋波  
東流散入任城河一倅六年心力破功勛只向河湄多河  
湄居民千萬數飽飫仁風想眉宇驪聲果爾召休徵次第  
麟兒來接武物理乘除自有期策名豈令君獨奇輸他  
魏闕金蓮燭贏得燕山丹桂枝今年再陟壺關令琴囊

書篋知清政百里暫屈龐士元一方久慕張忠定嚶嚶  
蟲篆多歷年凜凜牛刀初作用軒車到處駭魚鳥閭閻  
從此無貧病昨朝與君諧晉秦妻孥共喜門楣新今日  
題詩送君去臨岐似覺情猶親壺山高高潞水深數聲  
風笛愁人心政成明歲報天子洗耳漳河聽好音

送盧生潤卿判濟寧

幾年隨我沙溪上烟月扁舟獨來往一朝去作太學賓  
無限瑰玫徹清響何蕃聲價滿都門郭泰弘深衆標榜

歸來騶從夜傳呼天外恩光薄林莽除書借問將何之  
濟州去佐黃堂長州城側近臨官河聞道年來沙磧多  
風霾往往壅隄岸中流望望成岡坡今年况復春夏旱  
乾枯湮塞當如何東泉幾細南望淺潤通敢望來餘波  
國儲萬艘屈指到安得大雨傾霖霽往年有人事綜理  
小知沾沾只自喜入水開塍膚盡裂登山伐石血滿指  
徒費公家萬萬緡萬人枕藉河邊死滿路哭聲振林木  
泉臺有恨隨流水至今談者作口實纔說鑿排即掩耳

瘡痍旦夕思良俊詎可吹薶空坐視念君此去誠艱難  
把袂浩歌情未已發硯利器試盤根用世奇勲在良士  
危疑艱大敢負荷鳳翥鵬飛眼底是君才秋水霜初落  
高致赤城霞孤起莫將短髮負烏紗佇見休光映青史

題盧潤卿所藏陳所翁畫龍

畫師曾聞說所翁畫雨即雨風即風濃雲迷霧隨意布  
六合彷彿還鴻濛神龍拏雲忽直上鱗鬣頭角排層空  
蜿蜒夭矯不受羈光芒變怪搖雙瞳想是劍津初物化

不然初起南陽中胡為神異乃若此使我一見心冲冲  
只今歲早麥盡死一冬無雪天如烘深林固應有枯槁  
迅雷何日驚癡聾何當騰踏穿墉去飛流濺沫蘇困窮  
願學真真呼姓字安得妙筆如葉公金城況遠數千里  
屯膏壅澤尤難通盧侯素具為霖手文章術業今宗工  
此行好試隨車雨莫使陳鄭專前功

倪鋤帶經圖

明良何日逢佳遇幾見鵬鵬沒烟霧隴上荒田且未鋤

手把殘篇倚高樹早歲辛勤老未休由來經史非良謀  
君不見里兒未識兔園冊綺筵夜夜驪青樓

戲題兒子若谷扇

火雲燒空千萬里高堂都似薰籠裏正須紈扇一揮揚  
纖塵不敢來衣裳須臾懷袖清風遍却笑炎涼輕易變  
時舒時卷亦自如爾今久卷何時舒

七謠贈璞岡趙明府

自枚乘七發之後作者遂以七為體曹植七啟



張協七命傅毅七激張衡七辨以至崔駰馬融  
王粲陸機之屬各有七依七廣七釋七徵之作  
腴詞麗旨膾炙百世當時被揄揚者固已天壤  
與敝矣惟我侯善政無非可師余不敏不足形  
容萬一勉為七謠續貂前烈格調卑陋不足以  
言詩故以謠名耳情見乎辭俟觀風者採之

孤高謠

近日諛佞成風見貴勢畏若神明趨拜稱謂有不忍言者至對寒士則倨傲若無人

然侯上交不諂下交不瀆于學宮師友尤有恩禮其萬夫之望與作孤高謠

羣哇向人爭鳴鳴雅音大呂聲為孤洪流四野鍾波濤  
遠洲小渚形方高假令鄭衛無淫聲韶護何由得雅名  
下流沮洳無溟渤岱宗華嶽何突兀濛濛乎憧憧乎吾  
慮其忒人以為特昔以為同今以為崇乎

寒水謠

自下車來萬染俱忘平日巧苞苴  
善關節者側目而過作寒水謠

中州淇水來潑潑介鱗無數沾涓沫流入漳河愈覺清  
臨流誰識源頭活化作膏池一片冰炎威都被清風奪  
冰之清貯玉壺兮凝水精纖塵無地可附著瑤池月色

光盈盈冰之寒冷風積雪山紆干鳥鵲燕雀不敢近溝  
穴深處藏狸狌乞兒一任附炎熱仙人笑撫碧琅玕

弭盜謠

近日多盜非盡吾民之罪也盜生無禁治  
之術乃保庇之人有擒盜詣公庭者又罪

責之人孰不為盜也侯來甫數月四境肅然禾  
稼遍郊馬牛被野然則前日之多盜果民之罪

邪非邪作  
弭盜謠

往年盜如雲雲生頃刻成氤氲今年盜如雨一霽清明  
還快靚往年城市紛七首今年村落鎔刁斗風鳴犬吠  
總不關夜夜黃鷄與白酒衣毳衣綰墨綬嚴使君慈父母

息訟謠

吾邑素以訟為恥近日常來官府畏健訟者之持其後也恒以恩煦之有訴即理有控

即勝往往獲大利人事效慕昆弟子姪至以注律相授受侯衡平水止物無遁情此輩屏跡效

慕者悚懼

作息訟謠

小民懲乾餽健訟水赴壑隄防猶恐潰況乃輕排鑿年來訟牒紛如毛朝呼夜捉聲嘈嘈省臺部使等閒事直叫閭闔干西曹自從去歲冬十月突隳滅跡喧聲歇伸尼貴明德君子戒謀始狡誣不敢盡無情敢再強顏探風肯空庭啼鳥和琴聲永日一簾清若水

懾暴謠

豪強橫行街市武斷鄉曲甚至酗酒直至縣庭摔胥吏出不遜語令據案噤不敢發

言已七八年於茲數月來此輩望風遠去巷陌寂然作懾暴謠

豪強視法等兒戲長揖長官摔胥吏妖狐假得虎威歸  
犢麝雞豚避無計西風一夜明嚴霜蒿萊殺盡妖狐藏  
老稚相看笑啞啞手指門闌談庭堂何為近來不見惡  
少至裸身號咷堂中央郭解死齊民歌魯朱門外張崔  
羅

捕蝗謠

今年五六月候親捕蝗于境內炎風酷日勞苦萬狀余往候之見其唇焦口燥面黑

如漆不勝歎服仁哉侯之心也民有捕不盡  
力者重罪不貸故蝗飛蔽天禾無少損作捕蝗  
謠

蝗莫飛蝗莫飛閭閻赤子方啼饑蝗莫育蝗莫育田野  
青苗未成熟汝飛漫天復育子將使吾民駢首死吾受  
命吾專城誓與吾民同死生汝不盡滅吾不去吾曹與  
汝元無情手瘡痍面黧黑郊原彌望黃雲色

甘霖謠

吾邑凋瘵比他邑為甚然顧以代他邑征  
役銀多至數千兩侯恒以為病嘗吁嗟自

詭曰以殷富代凋瘵可矣乃以凋瘵代殷富乎  
今年夏久不雨侯毅然曰冤抑召早是豈不在

我急移牒高位乞為豁除天乃大雨遠近沾洽  
歲穀用登民欣欣以相告古稱隨車雨御史雨

其此類耶

作甘霖謠

今年夏月久不雨枯朽朝朝望天宇使君俛首坐堂上  
無言心念三農苦古來仁覆稱旻天旻天忍不吾民憐  
却恐民心有冤控無地和風乖戾高陽慙君不見東海  
湄冤孝婦三月亢旱成焦土又不見政不節禱桑林自  
責片語天為霖急尋案牒理故事眼底紛紛拂人意强  
將征役代他邦恐腹膏脂媚大位短章一騎飛紅塵任

他郡梟怒詈臺端  
嗔一章猶自可再章  
驚人心三章四章  
語轉峻和風旭日  
成陰森得請公移  
猶未下行潦水溢  
漳流深

招隱歌贈李從周三首

余負罪返故山徜徉終日殆與貧賤相忘回首宦境

輒慙慙然真畏途也姻友李從周本山人乃為鎮市長意甚不欲屢乞歸未得噫余城市而山林以為樂從周山林而城市其將以為憂乎乃作三歌以招之

山之中兮茅屋渠渠  
女組紉兮男詩書烟  
雲而侶兮芙蓉而裾  
聽風泉之泠泠兮忘  
陋巷之為居無毀譽  
之拂



膺兮無簡書之侮予胡為乎市之中兮冒埃壒之紛如  
蚤歸來兮山之隅山靈笑人方擲揄

市之中兮塵沙乾際兮坤崖驚濤破岸兮狂飈摧花濟  
無舟兮馳無車伊人素履兮何以為家蚤歸來兮途不  
賒聽桑顛之鳴鷄兮候屋角之朝霞

城中胥臺暴如虎橫索金錢又尊俎爭將魚肉視坊廂  
礪爪磨牙向鬻釜意氣誰敢少違逆不見昨朝對尉簿  
囁嚅巧附笙簧詞愆尤行與髡鉗伍前途日落風雨惡

雲深泥滑青衫薄，蹇驢獨策將安之。村村閉戶烹藜藿，  
何似歸途如砥平。閒庭怨殺孤棲鶴。

送盧廷彥南遊

廷彥晚歲耽嗜虛玄，將有瀟湘之遊，賦此壯行色，且以堅其志。

九月十月天肅清，清霜黃葉堆軒楹。道人曉起問蒼昊，  
手梳白髮心怛怛。百年浮世終有盡，萬物于我元無情。  
緇塵障天泥沒路，大夢誰向邯鄲醒。向平徒自累婚嫁，  
終南山色年年青。山中羽流愛岑寂，閉門不管秋蟲鳴。  
閒雲低低入牕戶，野鶴夜夜啄青精。靈境久抱幽棲志，

胡為世網空咿嚶明朝便當謝絕去妻孥任爾罄瓶罌  
江湖浩渺天地濶風中飛絮波中萍綠松翠竹靜相對  
紫芝黃菊修顏齡鷄鳴急起戒行李擡頭先寘黃庭經  
劉堯臣重葺明倫堂扶病草數韻旌之并以儆夫

見義不為徒捐貲以飾梵宇琳宮妖祠淫祀者  
憶昔正德庚辰時一春淫雨無寧期泮宮墊沒棟宇壞  
階墀森森成澤陂荒蕪終日蛙爭噪廟貌仆地誰能友  
我聞急往拜泥淖瞻依戀戀垂涕洟歸來齋沐告縣宰

鼎新只煩幾指揮賤貧不足動觀聽省躬敢復嫌遲遲  
嗟哉聖道等天地胡乃自外生成為急解簪珥典衣帽  
鳩工命匠同修治苟完足取待風雨不向垣塢論崇卑  
于今歟忽三十載丹青剝落塗離披殿廊門廡固無恙  
堂齋危墮將傾歌橫經問道無處所注漏何自容臯比  
宮牆過者日千萬寧肯側目來相窺豈無高位力足辦  
亦有富盛貲堪施徼福喻利心彌切周行茅塞趁山蹊  
今日漢壽亭侯廟明日碧霞元君祠緇流黃冠有建創

泰華不足方櫟題一聞鬻舍興土木拊膺頓足攢雙眉  
永川王侯蜀良士下車趨謁心神悲興學勸士曰我責  
敢同他務姑徐徐旁觀四境諗耆舊堯臣劉子堪承之  
劉子吾鄉舊閥閱牙籤鄴架饒書詩手持符檄徃事事  
捐貲累百心熙熙病中忽聞事就緒不覺賞歎還嗟咨  
急揮筠管道高誼愧無玉珮瓊琚辭

為曹廷潤題魚圖

昔年走馬官京畿見說畫魚劉錦衣江湖浩渺一塗抹

蛟螭神怪隨指揮家居僻巷曲復曲駕枉日日來旌旂  
殘縑今日得半幅明日筐篚羅門扉方塘十笏映堂序  
菱荷鋪水天容輝鱣鮪鰭鯪爭鱖鱖蜻蜓蛺蝶故飛飛  
君侯擲管坐池上蟲魚適意同忘機落筆信手入神妙  
俗師自覺多依違大魚七日見首尾小魚纔足分鱗鬣  
溟渤高飛九天外武陽下筍千頭餘無小無大意與會  
苦心只許良工知嗟余有目未荆識葉龍趙馬知瑰奇  
曹君何處又得此使我一見心縈絲年來風雨沙溪上

觀瀾無術慙漣漪  
烝然有魚不受釣  
扁舟六物空追隨  
在藻敢忘君子樂  
鼓枻時間漁父辭  
鉛槧平生無好句  
乾坤俯仰繫遐思

駱孝子廬墓詩

吾邑東北有村曰駱家莊莊旺駱宗仁蚤死妻商氏撫遺孤駱克讓

三十餘年嘉靖癸卯商沒克讓念父死葬送不  
如禮追恨無能為情又值母喪哀毀若割既啓  
藏合葬傍徨阡隴間不去曰吾何忍置吾父吾  
母于荒閒無人之境而歸樂室家乎乃于墳左  
作小廬伏匿其中日躬親負土衰經遠松楸哭  
叫三年如一日丁未六月鄉人勸之歸咸謂克  
讓茲事原百行關風化通神明非文字掄揚紀  
述恐或湮沒無以歆動來世且孝思者無所慕


效嗚呼世衰道敝人心不淑吾鄉近歲亦有三  
四人廬居墓次者孝情哀思不減克讓然以其  
讀書游宦及舊家子姓招人妬忌謗訾易生若  
克讓生與耒耜為伍性非文藝所化家無詩禮  
相沿而純孝天成人雖欲訾之將何以為口實  
也爰作長歌勒石墓道使過者商聲謳吟播揚  
無極于世道  
不無小補云

駱家原頭鬼夜哭寒風衰草聲  
藪藪狐嗥鵩嘯若同悲  
有人嗚咽吟我蓼攢眉低首恨終天  
萬古遐思情一掬  
吾父棄背三十年傷哉吾母今不穀  
泉臺音容終不見  
安用此身生碌碌鳥飛不盡天漠漠  
忍使吾親此孤獨



古稱事死如事生誰向荒原問水菽亟遣妻孥歸守舍  
日傍丘墳奉饘粥黃昏清曉雙涕淚斜風注雨半間屋  
墳邊淚濕無乾土怨雲夜夜來棲宿李興擗踊生芝草  
王哀攀號枯柏木淒淒中野餘三年赫赫賢聲震鄉曲  
鄉曲義士共捐貲遠村近村車馬簇函書走介徵我詞  
隧道貞珉高矗矗由來天性本相同景從雷動同伸縮  
在昔互鄉與勝里千年聞者心猶慙于時縱有斯人徒  
青蠅蒼狗終不淑乃知吾鄉風俗厚萬石里門鄭公谷

清時孝治光四海以茲便可入薦牘孝子忠臣非兩事  
移孝豈肯為國辱深巷無人採風謠通衢見說多推轂  
丹楓滴露自泣血白楊長夜應瞑目我言安足為重輕  
世情隨處生寒燠謾拈筠管動悲吟會見楚聲來陸續  
秋容淡淡滿長空不管西飛白日速



沙溪集卷十八

欽定四庫全書

集部

沙溪集卷十九至二十三

詳校官中書臣沈飏

中書臣劉源溥覆勘

總校官庶吉士臣何思鈞

校對官中書臣孫球

謄錄監生臣張永浙

欽定四庫全書

沙溪集卷十九

明 孫緒 撰

五言律

古松

萬壑千巖裏誰憐孤立情  
臨風雜鶴唳過雨帶龍腥  
遶迓霜根滑當牕月影清  
歲寒終未改不羨大夫榮

挽陸提學

一經魁兩浙蚤歲擅時名腰帶黃金瘦心憂白髮明機  
雲看世業羣愈愧門生永夜文星在空山暮雨聲

送劉子靜侍御兩淮巡鹽

孤鶴揚州路雙旌淮水波風霜看秀史花柳怨驪歌夜  
久江聲遠天空月色多估客俱含笑豪家柰我何

送潘司諫守漢中

沃野南山遠居人日更多半符聊試爾太守欲如何春  
晚袞斜路風清漢水波故園經別久綵服趣重過

旅中早秋

商飈動涼吹誰念旅中孤  
白髮二親景黃塵千里途  
家山秋斷雁庭樹夜多烏  
淒涼悲往事潦倒笑今吾

三忠祠

諸葛武侯文山也又曰三賢祠

拂袖拜三賢雲霞映暮天  
孤忠徒自許一死竟誰憐  
玄化昭心事丹誠付簡編  
明裡逢盛世盼蠻自年年

池亭晚坐有懷

池上晚成趣雨餘涼不禁  
濕雲低閣水凝霧遠迷林  
去

馬憑誰辨哀蛩識此心美人在何處良夜自沈沈

爛柯圖

不畏山蹊險來叅國手仙兩賢豈相厄一著竟誰先  
苔滑經微雨松聲應瀑泉楸枰纔半局柯爛已多年

沙溪集卷十九



欽定四庫全書

沙溪集卷二十

明 孫緒 撰

七言律

居庸關公署晚眺

一徑崎嶇萬嶺橫  
居民無地問農耕  
霜摧落葉晚山綠  
雨溜荒苔秋水清  
沙鳥遠從天外度  
寒蛩愛向月中鳴  
峰巒徙倚休回首  
何處孤雲是故城

蘇武

漢皇屈指計歸期十九年中事可疑一死從容真細事  
匹夫溝瀆竟誰知風彫使節丹心壯雪壓河梁綠水澌  
珍重李陵多問訊羝羊將乳雁來時

送范景曦任伴讀

景曦戒軒先生舅氏

直節當年振士林玉堂門下識翁深王家偉望聯甥舅  
賈傅才名重古今到處溪山供好句舊園桃李接新陰  
人生何地非勲業莫謂青氊負此心

送友人還濟南

伐檀踪跡滿河干，欲振家聲劍自彈。  
侍綵又添冠服好，掃松未覺歲時難。  
舟移汶水愁分郭，酒盡燕山媿識韓。  
向後停雲如有什，年年鴻雁到長安。

姚義士為亡友經紀曲盡

世態紛紜自淺深，共輕然諾重黃金。  
如君真可同生死，尚友何須論古今。  
百代爭看高士傳，九原應慰故人心。  
浮雲却笑東鄰富，終日營營雪滿簪。

遊孫文選伯堅舊圃有感

前日來看此衆芳  
科頭相對笑聲長  
聯床裘曲成新夢  
去國身輕憶舊裝  
千古勛名關道義  
幾人點檢愧行藏  
閒花真是無情物  
爭向春風弄晚香

挽黃兵部實夫乃正

青鸞飛去夜堂寒  
身後身前萬慮殫  
失口有時談舊事  
傷心何日到新安  
短床衾枕如相念  
破釜糟糠不可餐  
莫羨上林花卉好  
一春風雨坐凋殘

牡丹次韻

半捲羅幃識衛娥東風清露醉顏酡分來天上香猶在  
欲問洛陽春幾何明媚不須還解語招搖若為對高歌  
花前莫惜日沉醉回首南薰綠樹多

次韻贈劉文選乃翁大參致政

佳雛文彩絢朝暉老鳳雲霄已倦飛當宁有思高士去  
舊山無恙主人歸使車光映行邊月小澗春香夢裏微  
却憶扶筇尋樂處回頭深愧此朝衣

哭同年孟汝珍

賦罷長楊夢奠楹盡將經濟負生平  
北堂奄棄三遷教東野空留一日名  
物理有心推俊傑人生無福是聰明  
妻兒共抱終天恨洒淚新阡草正榮

新朝鐘次韻

神功陶鑄火初停神物還堪太史銘  
萬籟歛聲歸大冶百僚洗耳試新聽  
鳴隨仙仗元無戾氣應銅山固有靈  
叩罷在懸清晝永班行終見肅儀刑

壽同年錢士弘七十

號東湖八月十四日誕辰也

東湖魚鳥日悠悠石火茶烟稱釣舟  
萬首古風今七袞一輪新月欲中秋  
堂閒綠野饒笙鼓心遠紅塵任去留  
謾道渭姜猶健步十年前已賦知休

省曹夜宿懷周希沂時周亦宿兵曹

何人只隔短牆東咫尺牆頭百感通  
緩坐漫吟秋雨歎相思深恨暮雲籠  
半生乖蹇誰知已一代風標愧此公  
凝望夜闌翻自笑不知清夢若為同

送施彥器還台州

彥器嘗守河間  
以事逮至京

幾載滄江伴白鷗  
瀛南薊北舊同遊  
野雲有意終歸岫  
暮景傷心獨倚樓  
秉燭對君真夢寐  
高蹤何處最淹留  
兒童未解經過地  
嬉笑爭看郭細侯

代人送張黃門弘至使安南頒正朔

蚤將文彩重班行  
節映槎星夜有光  
恩向舊袍添上服  
口銜新命到南荒  
江山改色迎龍集  
島嶼同聲羨鳳陽  
收拾詩懷問民瘼  
歸來還入諫垣章



過沙河舟幾覆次陳內翰本初韻

舊見沙河自坦途波濤今日勝彭湖仙舟深愧漢名士  
魚腹將吞楚大夫筆底詠歌成謾興眼前生死未須圖  
獨憐千里高堂上新寄平安書到無

冬夜私歸省父望家有作

村巷無人樹有聲皎星寒月照孤城緇塵征橐兒千里  
白髮高堂夜屢驚膝下承歡真夢寐燈前細語自丁寧  
回頭莫語燕山道一品公孤俱浪名

送張二尹赴銓司

張君善草書大字段可久先生故吏也

塵埃無處著詩囊雙耳松風萬慮忘墨蹟妙傳王內史  
青袍不負段南陽高談邃古身如寄回首疲民思倍傷  
莫向離筵惜沉醉衛河東下水茫茫

送族兄炳分教廣靈

惜別時時問去程桑乾西下暮山平緇塵雙眼還雲樹  
清夜孤燈此弟兄官舍獨寒憐鄭老夷門未許困侯嬴  
春風桃李看勛業况復庭槐漸長成

同年朱宜直號松山

樹影前山吏隱深  
臨風磐石坐披襟  
光含庭院香生晝  
寒入郊墟覺苦心  
萬仞不妨高立壁  
四方從此望清陰  
補天柱國如相問  
不比凡材滿鄧林

黃岡張儒士清河張尹弟也上便宜七十五事既  
賜施行矣買舟南還摺紳多賦詩

笑指書囊望帝都  
敝裘孤劍怯長途  
策能匡世名安用  
言入危機迹更孤  
萬里雲霄看德業  
幾人廊廟愧江湖

黃岡別墅應無恙日日春風長綠蕪

楚江孤月水如羅雙槳輕搖自嘯歌  
瑞鶴圓吭鳴赤日  
大鴻寒影在清河平沙漠漠山城小  
世路悠悠野徑多  
父老莫驚風采異麻衣曾許拜鑿坡

送趙地官叔鳴

珍重平生契誼深  
水萍蹤跡又分襟  
時名到處慙同志  
易學何人識苦心  
小試餘才清會計  
還看高興逐登臨  
海天雲樹今千里  
風雨明朝思不禁

輓強都憲

盡卷經綸地下藏  
荒原烟樹夜微茫  
幽冥有恨空長劍  
江漢無慙此素裳  
孤壘終還天未遠  
一封曾與日爭光  
奇勲隨處題名在  
過客惟看劣史坊

送熊繡衣按東廣便道省親

一鞭風采過家山  
宦境人爭羨此還  
畫錦雅宜供戲綵  
霜威暫破為承顏  
笙歌夜簇驩聲永  
杖屨春生樂意閒  
明日便臨東廣路  
瓊崖矗矗水潺潺

送焦閣老致仕

忍笑投簪出禁林，都門黃葉報秋深。  
蒼生其柰東山臥，湖海誰知後樂心。  
舟載夕陽橫野渡，堂閒清晝看槐陰。  
釣遊舊地俱無恙，藜杖從今得再尋。

送劉閣老還鄉祭掃

清風千里送仙舟，詔許南歸拜壠丘。  
滿路傳呼新使相，三朝勲業舊通侯。  
秋霜落木逢嘗薦，畫錦看山是勝遊。  
天子臨軒方注望，北來旌旆莫悠悠。

送廖彥還瓊州

廖太常廷  
陳族弟也

南國常懸北薊思，海天空濶雁飛遲。  
孤航萬里心尤壯，綠酒青燈喜可知。  
別調埙篴新按拍，撼庭風雨柰歸期。  
水萍蹤跡渾閒事，莫向垂楊歎別離。

漫興

盡卷經綸付杖藜，芒屨一任路多岐。  
風來高樹鳥爭噪，雲滿秋山人未知。  
蘭桂有懷營北渚，簾揚何計問南箕。  
隴梅驛使無消息，去去奚奴莫太遲。

搗茶

何物狂生九鼎烹，敢辭粉骨報生成。  
遠將西蜀先春味，臥聽南州隔竹聲。  
活火乍驚三昧手，調羹初試五侯鯖。  
風流陸羽曾知否，慚愧江湖浪得名。

梅花

北雪寒雲未可親，玉容肯受朔風塵。  
月從開後疑無色，天向枝頭別有春。  
隔屋凍林還映水，到窗寒影自宜人。  
年來不作調羹夢，荒圃疎籬意最真。



送李公遇少參回憩周溪寺

雪消幽徑大師房  
新茗供茗笑語長  
南去故人今數里  
東家昨夜憶連牀  
坐聞清楚心無累  
地隔紅塵水亦香  
明日回思又陳迹  
衡河雲樹曉蒼蒼

莎汀四首

霜厓高處聽漁歌  
日日壺觴藉淺莎  
沙上鳬雛還聚散  
渭濱熊兆近如何  
潮通滄海波聲遠  
地隔紅塵月色多  
雙眼不容雲樹礙  
一簾終夜對明河

入望青青莎徑深西風落日力難任  
葉垂清露澤通澗色暗湘簾  
山正陰物態有情歸地主化機  
隨處見天心危闌側近莫喧笑  
下有蛟龍時一吟

門前漳水日東流水際閒汀草自  
柔雨後繁枝青似織風來學舞翠  
先浮江湖渺渺還憂國鷗鷺年年  
共此丘寄與上林花木道明年春  
色倍相酬

斷渚新莎日日生蟠窓侵戶總多  
情晚風雙屨苔應識夜雨孤燈水  
自清尺地未忘元化在九天今見  
秦階平

鷓鴣鶴鶴年年事不及鷗鵬萬里程

書董子祠壁

雲滿空庭水滿渠  
顏垣曾見駐安車  
九天不盡三篇策  
繁露無慚一畝居  
謾說韓彭悲犬兔  
肯同馬鄭注蟲魚  
茂陵勛業今安在  
俎豆春風自有餘

送韓宗器

鬢如野鶴意如鴻  
萬籟都歸一笑中  
夜雨對床談聚散  
秋雲無蒂任西東  
青袍不惜連朝醉  
素履何慚太古同

聞說夢熊消息近由來天道本如弓

重遊陵縣乾明寺

不扣禪關三十年遙岑烟水故依然  
雀歸古堞客方到蟲篆殘經僧未眠  
黃葉一庭秋瑟瑟清風四壁夜娟娟  
侯芭漸老知無用慚愧何人守太玄

元宵後大雪訪呂鳳儀次戈宇清李公從馬嘉貞

聯句韻

北望衡茅信脚行向人風雪自多情  
孤村梅影憐春瘦

穿土萱芽待晚晴斜日平林雲漸薄方塘活水鑑同明  
鷗程終見歸鵲序未許鷗盟老此生

誕日宿周溪寺

石上殘經擁綠苔鮮飈輕露藉疎槐流光過眼都成幻  
逸興橫秋未易裁釋氏當年親抱送梵宮今日又重來  
憑君莫話懸弧事一刻談空萬念灰

重遊周溪寺感舊

拂塵細看舊題名風景依然百感生一徑松蘿驚白髮

十年林莽愧青萍悠悠往事真成夢寂寂空門此寄情  
却憶故人在京洛湘簾低簇曉堂清

病中次楊師文見寄韻二首

到處輕車壓路塵閒愁如覓妬佳辰溪山千里共明月  
風露一庭憐此身花外斷鴻新物色水邊驄馬認遊人  
陳蕃舊榻應無恙記得當年吐錦茵

長缺床頭半欲塵笑談去歲憶茲辰碧山百感雨風夜  
滄海幾年萍梗身渴愛江梅憑驛使興隨沅芷怨騷人

何當一醉仙茅酒共臥林亭綠草茵

清明夜與諸友圍碁觀音寺

行人側耳聽碁聲敗屋殘燈夜未平  
滿樹風威隨白戰半庭月色趁清明  
冥心似悟門中味真境堪忘世上情  
欲向蒲團醒大夢東林深處問啼鶯

再題友人故居用前韻

恒山西望隔年餘何處山椒問起居  
一曲紫簫還院落半庭紅葉憶衣襦  
塵絨詩壁螢空度雲滿寒塘鶴正癯

莫向藜牀談舊事  
秋風秋雨自街衢

冬夜宿李又修太守宅話舊

屈指同遊四十年  
感今懷昔夜潛然  
共驚歲月奔如電  
謾說蓬瀛別有天  
湖海自憐輸陸羽  
廟廊誰復似韋賢  
何如滿飲杯中物  
醉向藤牀抱瑟眠

怯寒獨擁驢裘  
庭木號風夜未休  
感客賦成天動色  
美人歌罷月如鉤  
園池蔥鬱看新第  
村巷依稀憶舊遊  
別後思君何處是  
漳河日日水東流



綠酒青燈夜未央  
酒酣還憶舊庭堂  
簾櫳撲地曉風細  
花木滿堦春晝長  
書劍都歸緱氏學  
兒童亦識鄭公鄉  
年來奔走知何用  
一涕沅瀾此素裳

漢陰亭題壁

菜有新芽藥有藜  
十年抱甕小亭東  
栽培敢借三時力  
枯槁終期一雨功  
烈日滿庭欺枕簟  
浮雲何處自悵蒙  
世人莫笑生涯拙  
纔撤機心即古風

送崔義甫之任漢陽幕

畫船高岸紫綸巾  
白鳥驚飛綠柳新  
地遠共憐家落莫  
官卑偏覺路逡巡  
風生洲渚三湘水  
日落江湖萬里身  
莫倚危檣頻北望  
楚鄉雲樹易愁人

宿霧迷雲黯未收  
壯心官況渺難留  
凌風鵬鷃常侵蚤  
到日鱸魚正及秋  
千里不堪垂老別  
一經敢負少年遊  
湖南何處溫生幕  
江雨瀟瀟漢水流

哭孟子乾行人三首

子乾者都憲時元子余門生也武宗將南狩子乾率同列

伏闕被

杖死

臥病滄江歲月深每逢京使問佳音  
乘驄事業期平步倚馬才名竟陸沉  
一日紛紜驚白晝孤囊經史憶青衿  
泉臺漠漠空長劍天宇茫茫自古今

雙淚闌干麻紵衣素谿何日再漁磯

素谿子  
乾別號

義當有激

身如寄死可無慙願竟違鵬翼九天孤  
衆望龍逢千古話同歸舊緘不忍重開  
讀腸斷當年急手揮

乘時孤鼠日憑凌欲借朱雲劍未能獨  
抗皂囊輝白日肯將素履負青燈乾坤  
回首成今古陵谷何心自廢興

錄廕共憐新上舍

子乾之子以父死  
于忠得入太學

踽涼誰念老中丞

哭劉堯卿三首

老淚縱橫濕佩裾  
西風吹雨滴堦除  
衰年寧受多情累  
苦口曾輸一得愚  
江海幾年真夢蝶  
饑寒每出歎無驢  
人生回首成陳迹  
物理誰當問太虛

秋聲淅淅送深悲  
往事悠悠只自知  
四海未家憐立壁  
孤村何日再圍碁  
精英彷彿還談笑  
道路喧傳半信疑  
西望停雲腸欲斷  
短檠清淚夜闌時

綠樹青蒲野水濱  
蕭條僧寺靜無鄰  
半床不寐同聽雨  
一局成功詫有神  
屈指舊驩才兩月  
傷心猶記誓三辰  
他年再過村西路  
忍見開樽聽上人

漫興

行年五十未知非  
漳水灘頭獨掩扉  
萬里歸來雙鬢在  
一經真與衆情違  
月明古渡漁燈暗  
秋盡空山木葉飛  
今我故吾何必問  
望中星宿漸依稀

送族姪悟會試

萬里天香襲珮裾六街塵土沒征車離亭風笛回轅處  
宦海雲程發軔初疏傳歸來真老悖封胡久矣重庭除  
他年勛業期無負漳水河邊此敝廬

謝郭巡按楠推薦

逢人怕問小山吟野水沙田自陸沉風定晚葵還向日  
雲來高樹易成陰相知常按朱門劍報國誰同繡斧心  
夜據槁梧頻引頸薊南烟霧望中深

柱史封章賁草萊渚鳬汀鷺共驚猜松筠苦節霜應識

枯槁經年雨未來  
天下澄清先北冀  
閩南人物重西臺  
長安雖近無由到  
夢裏逢君笑口開

寄題趙明府十松軒二首

小閣憑虛瞰遠江  
斷巖呈秀映濤瀧  
簷前日對青松十  
雲外時來白鶴雙  
屈指默聽聲淅淅  
累觴遙望影幢幢  
廟堂梁棟須珍重  
一榻清陰月滿窓

南溪深處小山亭  
石枕藤牀任醉醒  
四座烟霞雙眼碧  
一庭風露十松青  
疎簾有月邀清影  
驚鶴盤雲自遠汀

盡日推窓看未厭杖藜夜夜獨來聽

提學王侍御應鵬枉顧用老杜秋興八首韻見貺

次韻奉謝

高風勁節振詞林一路霜威萬木森到處溪山供好句  
無言桃李自新陰停橈許我同清話傾蓋還誰識素心  
感慨未忘還切切撩人何處送秋砧

參差塢曲斷牆斜反鎖衡門髮半華敢恨長街啼露葉  
忽從深谷見星槎淒涼往事妨秋枕淅瀝悲風趁暮笳



明日漢陰亭上望

新構小亭  
曰漢陰

繞籬寒菊又黃花

漂泊孤雲映落暉  
隔籬燈火望中微  
半窓寒月蟲如訴  
萬里晴空鳥自飛  
慰藉謾勞青眼在  
乖疎恨與素心違  
何須苦羨尊鱸膾  
漳水波深魚正肥

醉中握槊靜中碁  
遣興真成喜塞悲  
遠辱軒車輝白屋  
敢將書劍負清時  
天空野曠青驄健  
風急波深綵鷁遲  
北望旌旗見烟樹  
茫然何地寄相思

木落天空獨見山  
西風常日到林間  
蓮塘菊圃秋方淡

莎徑柴門夜不關  
自愛閒鷗相伴住  
喜從威鳳識君顏  
遠期內直金蓮貴  
蚤押中朝玉筍班

野雲低度短牆頭  
白草丹楓趁遠秋  
賈傅才名成底事  
張衡詞賦易生愁  
幾年堅癖遼東豕  
萬念都輸海上鷗  
畫舫清流羨君去  
漳河直北是瀛州

淳龐默挽得全功  
英俊都歸杖屨中  
幾處槁枯還化雨  
層空山斗識高風  
斷厓霜靜波新綠  
遠壑秋深葉盡紅  
朝寧舊遊如見問  
甘陵陵下一哀翁

驄馬翩翩路不迤  
新詩慰我小塘陂  
清名琬琰看千葉  
碧海珊瑚只一枝  
積恨敢吟東武句  
抗容深愧北山移  
別來相憶渾如夢  
秋雨秋風簾自垂

寓意

看盡雲山此杖藜  
布袍隨意坐山溪  
心無困擾柴關迥  
夢有餘閒野鳥啼  
囊裏桐音多舊譜  
巖前樹色試新題  
美人望望家何在  
流水橋東竹塢西

初度宿馬嘉貞周溪別墅三首

嘉靖丁亥  
八月二日

高樹連雲野水邊  
朱簾紅袖映芳筵  
不才深負桑蓬志  
忍淚哀歌我蔚篇  
鵬翼扶搖看巧宦  
蟲雕辛苦憶當年  
林丘處處堪忘世  
何必蘇君二頃田

水頭秋思動疎枝  
鳥外烟霞佐酒卮  
衰老怕逢初度日  
嬌癡翻憶少年時  
世無鮑叔誰相念  
坐有韓娥醉不辭  
太乙長庚俱浪說  
夜深引領望南箕

五十四年山澤癯  
懶從朋舊話居諸  
壯心盡付沙頭鷺  
生計都非屋裏書  
九陌市塵天漠漠  
一簾風露夜如如

屠龍手段今安在笑挽梔鞭策蹇驢

戊子除夕

日日頭顱白髮增乖疎終老漢陰亭江山今古此除夕  
朋輩幾人如曉星占歲細看新鳳歷引年深負舊熊經  
角聲處處東風外坐惜韶華不忍聽

哭李公從二首

水自潺湲月自明畫船紅燭記君行連床已負平生約  
敗壁空題舊日名老淚可堪吳季重何人解惜李宣城

傷心忍死封書處大半畝斜字不成

沉沉清夜起新愁處處逢人說舊遊  
粉署黃堂真一夢怨雲淒雨識孤舟  
無兒更汴漳南澤有恨應憐水上漚  
回首方川隔今古數聲啼鳥故園秋

送劉芸窓西行二首

湘簾漠漠晚陰陰四壁寒燈一夜心  
往事幾回還執手離憂大半付悲吟  
薄裳應怯秋風勁弱質寧堪風露侵  
咫尺柴門天萬里畢家莊上暮雲深

當年有竹軒中酒半榻清風一局碁今日周溪橋下路  
兩行紅淚幾篇詩夜談不盡鷄偏惡秋色含悽鳥未知  
歸去西園尋舊跡梧桐蕭瑟雨聲悲

秋夜宿楊師文別墅

窺林纖月印庭除曲水崇隄盡不如寂寞一區楊子宅  
芸紉萬軸鄴侯書槐陰有子今成市草色侵階晚未鋤  
別後思君何處是閒雲無數夜窓虛

漫興

綠樹蔥蘢透月明  
夜涼如水葛衣輕  
捧心一笑千金重  
擁鼻孤吟四座傾  
對景未忘傷往事  
指天終不負芳卿  
燈花落盡碁聲碎  
多少行人識姓名

哭楊師文二首

北村風景總非前  
記得西堂醉共眠  
中散已亡琴自絕  
徐生忍見榻猶懸  
停雲低度孤帷月  
滯雨空迷萬里天  
泉路莫嗟浮世短  
秋燈稚子夜如年

萬變何如一局碁  
宦途隨處策勛奇  
皂囊未愜朱雲願



素履惟應白日知，蚤向人間先溘露。夜歸天上定騎箕。

漢陰亭畔花如錦，還似留君不住時。

君未卒前數日訪余漢陰亭上亭花

方盛時余留宿共賞堅執不可歸即病不起

庚寅除夕寓朴莊別墅

小兒若緘方病痘

藜杖龍鍾野水邊，雲霄壯志尚依然。一家此地都三口，半夜殘燈是兩年。端揆故人情漸薄，瘡痍稚子老偏憐。梅花疎冷君休笑，明日春風下九天。

辛卯人日

春波試暖綠粼粼  
泰律初回未決旬  
百代光陰真過客  
一年歲序又逢人  
杜陵豪句愁仍在  
方朔占書迹已陳  
殘照滿庭雙袖手  
亂鴉聲裏柳條新

小軒即事

野水溶溶草樹荒  
高軒誰問鄭公鄉  
門開風入筆如劍  
窓破月來書在牀  
萬變依稀都是夢  
半生寵辱已相忘  
鶴長鳬短君休笑  
終遣緇塵遠素裳

嘉靖癸巳余甲子既週戲集唐句二律自壽

綠楊如髮雨如烟

崔魯

家在枚臯舊宅邊

趙嘏

世事茫茫難

自料

韋應物

清詩句句盡堪傳

杜甫

丹臺已運陰陽火

陸龜蒙

算

老重經癸巳年

竇常

日暮長堤更回首

許渾

何人倚劍白雲天

李益

綠樹重陰蓋四鄰

王維

世情誰是舊雷陳

元稹

簾前

春色應須惜

岑參

夢裏輸贏總未真

李山甫

白酒釀來緣好

客

呂洞賓

金魚多解乞佳人

曹唐

五湖烟水郎山月

皮日休

得

見明時下壽身

司空圖

# 過楊師文墓

四十餘年老友生獨堪羸馬過佳城碧天萬里晚風勁  
斜日半林秋草平修短共誰談物理踽涼今日見人情  
著鞭欲去重回首辜負山陽夜笛聲

夜坐懷王守信守信病久不出

碁邊久不見王生月色蟲聲滿戶庭杜老有情憐日暮  
陶潛無酒怨雲停雄談已爽年前約霜疾空閒肘後經  
安得對床同聽雨漢陰亭上一燈青

弟善甫亡後數年再過其別墅

萬景都非此復過綠陰還是舊婆娑  
花當結子天機在樹不成行野意多  
漠漠鵲原空下淚悠悠蟻夢自南柯  
夜床誰共姜肱被暮笛愁談向秀歌

沙溪集卷二十

欽定四庫全書

沙溪集卷二十一

明 孫緒 撰

五言絕句

商景貞草蟲畫二絕

碣石移山小微風動紅蓼  
青蛙禁不鳴寂寞池塘曉  
紅芳開未繁蜂蝶亂如織  
莫羨上林春同是東風色

李侍御秋霜瘁草卷

攬轡西川路霜飛玉簡寒繁枝俱殞落明月滿秋山

魚樵圖

抱膝余長吟息肩君賞音歌罷解攜去山高江水深

野鶴圖

雲來雨滿溪天迥風生壑山水諧于心獨樹孤琴鶴

和楊師文短吟四首

春花饒艷色春禽鳴好音脉脉花前醉悠悠別後心  
綠酒映花紅花枝美人醉非關醉欲眠思君坐成寐



把手江頭別風波奈遠人清歡何日是擲琰問江神  
羞整越羅裳晨梳到晚粧盟心秋水白舉首遠山蒼

溪沙集卷二十一

欽定四庫全書

沙溪集卷二十二

明 孫緒 撰

六言絕句

雪

弱態風飄下上寒姿地勢高  
卑疎密任君舞弄險夸待  
我平治

雪壓天容甚近日落風威未休  
今夜冰合曲巷明朝水

添御溝

入望青山易老深巖梅樹差強見說剡溪來往何人伊  
洛門墻

松下問童子圖

羽客朝元去久山翁有約來遲風馭遙遙何在雲飛處  
處堪疑

沙溪集卷二十二

欽定四庫全書

沙溪集卷二十三

明 孫緒 撰

七言絕句

送陸時明還鎮江

北固山前江水平  
南徐城外月華明  
故鄉朋舊驚相問  
幾日除書下帝京

白頭翁

知止應無弋繳憂  
平林斜日共悠悠  
羽毛不預世間事  
一任傍人笑白頭

司馬相如

一拂冰絃萬古思  
娉婷誰不願齊眉  
可堪題柱榮歸後  
不似臨邛初見時

淋漓醉墨灑橋梁  
意氣橫空組綬長  
回顧文君通一笑  
不將風韻學裴航

臨風一曲鳳求凰  
窻外時時膩粉香  
風定月明人去後

孤囊今夕又藤牀

題馬嘉貞畫四絕

孤琴巖壑畫陰陰  
澗雨山風野水深  
咫尺斷橋心萬里  
美人家在翠微岑

雨後青山畫不如  
山蹊深處野人居  
花開花落年年事  
閒看溪橋策蹇驢

看山不盡扣舷歌  
雙眼浮雲萬頃波  
盡說鱸魚稱蓴菜  
秋風秋雨奈愁何

小槩從教野水欺短簷偏受朔風吹得魚換酒且同醉  
老盡青山總不知

奉和相國費鵠湖先生遊待隱園

一逕烟霞入望深鳥聲終日在高林澗邊幽草青如織  
誰識江湖後樂心

題扇寄楊師丈三首

杖藜談笑出幽林囊底絲桐物外心古調即今誰復愛  
竹風山雨舊知音



短棹橫江酒滿罌  
細鱸偏稱紫萸羹  
何年共向茅亭醉  
臥聽瀟瀟暮雨聲

倦客維舟倚短松  
亂雲流水愧行蹤  
蓬窓今夜鄉關夢  
飛出前山第幾峰

寒鴉萬點圖二絕

谷口重陰鎖未開  
寒風應識夜啼哀  
南飛下攬皆無計  
不見丹山老鳳來

高樹平柯滿上林  
夕陽未下晝陰陰  
誰從羣啄爭食處

識得無窮返哺心

謝安東山

松聲淅淅水聲清一曲秦箏萬古情自是東山無宦況  
非干紅粉誤蒼生

東波琴操

詞鋒如箭口懸河一語投機大夢吽今日平康誰得似  
只聞鞍馬夜來多

小齋即事

記得清明共此遊  
北窓眼望重回頭  
重來徙倚情何限  
烟雨茫茫風滿樓

靜倚危檣水氣高一竿  
終日印驚濤誰知我亦絲綸手  
不解西江掣巨鰲

古怨

短髮垂垂颺曉絲  
疎槐落落怯秋颺  
巫娥欲赴高堂夢  
須及襄王未老時

即事

烟雨茫茫失遠村東陵瓜地傍衡門袖中雙劍依然在  
換得黃牛教子孫

為盧宗玉題畫二首

杖藜偏稱紫綸巾畫舫清流處處新誰向山蹊更回首  
竹橋西畔問幽人

高興無慚秋水清畫船簫鼓一身輕江天遮莫浮雲變  
鷗鷺烟波自有情

便面

結屋雲山深復深  
人間萬事付蹄涔  
美人只隔村西路  
一夜相思萬里心

買臣負薪

西望咸京路渺漫  
碧霄何日劫泥蟠  
儒生常被青袍誤  
莫訝山妻冷眼看

濯足

雙脚曾為萬里行  
斷崖依舊水深清  
塵泥蕩滌須教盡  
莫惹征夫又濯纓

太公

五尺絲竿八十餘無端西伯有徵書迂疎亦抱磻溪志  
却恐官家要納魚

愛山

幽人坐愛山光曙家在深山更深處綠陰碧水晝遲遲  
時有閒雲自來去

圮橋進履

盛項誅秦只緒餘爭如雲壑赤松居也知高帝輕儒者

終負先生手授書

遊春

蹇驢何地不閒遊  
山自青青水自流  
收拾奚囊晚歸去  
半橋新雨沒汀洲

爛柯

相逢一顧意欣然  
東望蓬瀛水拍天  
石上輸贏才半局  
人間陵谷已千年

琴泉

半生葵藿久相知  
短髮偏宜小接羅  
一曲猗蘭青眼共  
碧山無盡鳥飛遲

雪景

松僵竹折雪未休  
北風落日寒飈颼  
水邊梅樹著花未  
試問扁舟王子猷

御水紅葉圖

一葉丹楓起素秋  
都將舊管滌新愁  
深宮誰識無窮恨  
只有年年御水流



秋江鷗鷺圖二首

一夜西風拂樹林  
霜崖高處水聲深  
瀟湘千里無窮意  
漠漠長空識此心

共愛修翎占淺沙  
鱸魚行帶滿晴波  
誰知秦養樊籠處  
不似江頭野興多

朱買臣負薪圖

平生筋力此疲饑  
霄漢明年見遠飛  
何須懇懇求鄉郡  
只為歸來詫故妻



沙溪集卷二十三

半生葵藿久相知  
短髮偏宜小接羅  
一曲猗蘭青眼共  
碧山無盡鳥飛遲

雪景

松僵竹折雪未休  
北風落日寒飈颼  
水邊梅樹著花未  
試問扁舟王子猷

御水紅葉圖

一葉丹楓起素秋  
都將舊管滌新愁  
深宮誰識無窮恨  
只有年年御水流

秋江鷗鷺圖二首

一夜西風拂樹林  
霜崖高處水聲深  
瀟湘千里無窮意  
漠漠長空識此心

共愛修翎占淺沙  
鱸魚行帶滿晴波  
誰知秦養樊籠處  
不似江頭野興多

朱買臣負薪圖

平生筋力此疲饑  
霄漢明年見遠飛  
何須懇懇求鄉郡  
只為歸來詫故妻



沙溪集卷二十三